

ÁR NDUÍ AR TESALONISENSE

Ar 'bet'o he'mi bi 'yot'a ar Pablo bi
mempa ya me Ntesalonika

Ar nzengwa

1 Nuga dar Pablo, ar ku Silbano ne ar ku Timoteo, di peñ'ahe nunar he'minu nu'ahụ gar gamfihụ me Ntesalonika, gi 'buhwihụ Jö ar tsi Dada mhets'i ne ar tsi Hmu Hesukristo. Jö ma Dadahụ da 'ra'ahụ n'ar hogam'ui ne da hwëk'ahụ yá ñho.

Yá hogam'ui ya gamfi me Ntesalonika

²Hyax'mu di umfe njamödi Jö xka jamfihụ gi gathohụ, ne hindi tsayahe di afe Jö da m̄ax'ahụ.

³Nú'mu di afe Jö ma Dadahụ, di beñhe hangu xka mpehụ, ne tengu ar ts'edi xi 'ra'ahụ ri jamfihụ ne ri mhötehụ, ne hanja gi pe'su ar ts'eti gi to'mhụ da penga ar tsi Hmu Hesukristo.

⁴Tsi kuhụ xa mö'ahụ Jö, di pöhe xi hwañ'a'ihü'ö.

⁵Nú'mu nda hös'ahe ar hoga mhö, hinge hönse ya mhö da xi'ahe. Da möñhe hár ts'edi ár Hñö Jö, ne ndi pöhe xiñho majöni nö'ö da xi'ahe. Ga hyandasehü ma m'uihe nú'mu

ndi 'buhwihup'u ndi hoñhe ngi 'buhü xiñho.

⁶Nu'ahụ ga teñhü ma m'uihe ne ár m'ui ar tsi Hmu Hesukristo. Ga hñömfu ár mhö, mödi ga thohü nzeye ya nt'utsa. Ne ngi johyahü ngetho ngi pe'sfu ár mfats'i ár Hñö Jö.

⁷Jange gatho ya ku me Nmasedonia ne Akaya temp'atho ri m'uihü.

⁸Xka jafu xi nxanga ár mhö Jö, hinge hönse Nmasedonia ne Akaya, hagatho födi xka jamfibihi ár mhö Jö. Jange nuje 'mu, hinge mahyoni te ga möñhe, gatho födi.

⁹Ngetho gese'u mpede benga nú'mu nda tsöñ'ahe, ne hanja ga 'yoxu nö'ö ndi möñhe. Ne hanja ga hyehup'u ngi ndöñhü ri tsitahü emp'ö, ne gi pefu Jö togo majöni ne hö ar te.

¹⁰Ne pe'u hanja gi to'mhü ár T'u Jö xta 'ñe mhets'i nö'ö bi mengi bi nte. Gehnu ar Hesu pokagihü hinda zukagihü ar döta mfe'i ba ep'u.

Nunar 'befi bi meñnu Ntesalonika ar Pablo

2 Tsi kuhü, gi pösehü himbi m'e ma 'befihe nú'mu nda hös'ahe ár mhö Jö.

²Mödi m'et'o xa da thohe nze_ye ya mfe_i ne ya nts'ani núnu Nfilipo, ngu xka 'yohu, Jö bi 'raje ar ts'edi, ne bi tsä da hös'ahe ár hoga mhö. Mödi da thohe ya thogi, hinda ntsuhe.

³Da zo'ahe nö'ö majöni. Ma mhöhe hinge hongar hñö, wa ar hyate.

⁴Ngu bi numañhogihe Jö nda zokagihe nga möñhe ar hoga mhö, jange go ge'ö di möñhe, hinge njangu nu'u ne da gohwi xiñho yá mijö'iwí. Ngetho nö'ö di neje, ga ko'behe xiñho Jö ma Dadahu togo pötka ma mfenihu.

⁵Hinxta ka'ahe xta xi'ahe ya nzatho mhö. Hinxta ne xta ha'ahe nga hömp'ahe ri bojöhu. Ar tsi Dada pödi njap'u ngu di möñhe.

⁶Hinxta hoñhe da ñeska ma nsuhe ya jö'i, ngu'ahu wa ma'ra, mödi mi tsä nga a'ahe, ngetho yá mpotegihe ar tsi Hmu Hesukristo.

⁷Nö'ö da pehe, da mö'ahe ngu n'ar nöñö mödi ne su ár bötsi.

⁸Xa da mö'ahe. Ne hinge hont'a ndi 'buhe nga 'ra'ahe ár hoga mhö Jö; ndi 'buhe nga 'ra'ahe ma tehe nu'mu mahyoni nga othe, ngetho xa xta mö'ahe.

⁹Tsi kuhu, gi pösehu parxui mi tsaje ndi mpehe, ne njap'u nda tsä nga tañhe nö'ö ndi k'athe. Ne hinge nga ot'ahe ar xuhña nú'mu ndi hös'ahe ár hoga mhö Jö.

¹⁰Ngu pö Jö ne nu'ahu n'ehe, nú'mu nda 'buhép'u, da 'yohe xiñho ha ri nthandihu nu'ahu xka jamfihu. Ne da 'buhe n'ar hogam'ui, hinte da othe nda k'as'ahu m'efa.

¹¹Gi pöhu hanja ndi zo'ahe, ne ndi hup'a ri müihu n'a ngu n'a, ngu n'ar dada zo yá bötsi.

¹²Ndi 'bep'ahe ngi 'buhu ngu mahyoni da m'u nu'u togo xi zohna Jö da m'u hár ts'ut'wi, ne da hyandwa ár nsunda.

¹³Nuje n'ehe hindi tsayahe di umfe njamödi Jö, ngetho nú'mu nga 'yoxu ar mhö da xi'ahe, ga nuhu hinge ngu ár mhö n'ar ñ'ohotho. Ga nuhu ngu ar mhö majöni ár meti Jö, mpe ha ri müihu, nu'ahu xka dathwu ri tehu.

¹⁴Tsi kuhu, xka thohu ya nt'utsa mahyegi ngu xi tho nu'u ya ku 'bu ha yá nijö ar tsi Hmu Hesukristo 'buhnu har hai Nhudea. Gi njahup'u xi utsase'ihu ya mengu ri haihu, njangu xi utsase'u yá mixodyowi.

¹⁵Nuya xodyo go bi hyo'u ar tsi Hmu Hesukristo, ne gese'u bi hyo yá m'ehni Jö, ha nuje bi gukagihe. Hingi ne da mepa Jö'u, ne utsa gatho ya jö'i.

¹⁶Ngetho hingi hegagihe ga zohe nu'u hingya xodyo da mpo'u. Xa xi nt'ata yá ts'oki, jange Jö xi 'yekwatho ár döta mfe_i.

Ar Pablo ne da mengi ma da k'ö'sa ar nijö 'bu Ntesalonika

¹⁷Ma tsi kuhu, 'ra ya tsi pa hinxta 'buhu mahyegi. Mödi hinxta ñhanthu, ha ma müihe mi oda ar mfeni ga hant'ahe, jange xa di nehe ga nthehu man'agi.

¹⁸Ndi nehe nga möhe ma nga k'ös'ahe, mödi ar Ts'ondöhi xi k'askagihe. Gesegi ar Pablo ri kuhu, xa xta nemhö ga map'u, ne hinxi tsä.

¹⁹Ngetho teme nö'ö di to'mhe, teme ma johyahe, ne hanja ga tsuhe ma nthöhöhe nu xta e ar tsi Hmu Hesukristo. Ha hinge ga höñhe ngetho xka jamfihu.

²⁰Hö, ngetho xka ñ'emuihu ma da t'eska ma nsuhe ne ma ga njohyahe.

3 Himbi tsa da to'mhe nga pöhe tengu xka 'buhu, jange da beñhe nga kosehenu Atena.

²Ne da peñhe ma tsi kuhu Timoteo ár 'bego Jö, ne ma maxtehe hár 'befi ar tsi Hmu Hesukristo. Da peñhe ma nda k'ös'ahu nda hñup'a ri muihu, ne nda max'ahu nda te ri jamfihu.

³Njap'u hinto di tupa yá müi ya nt'utsa gi thohu. Gi pösehu xi ts'onkagihu ga thohuyu.

⁴Nú'mü ndi 'buhwihu, da xi'ahe mi mahyoni nga thohu nzeýe ya nt'utsa ngu gi thohupya.

⁵Jange himbi tsa da to'ma ma'ra ya pa. Dama da peñna togo nda ñ'ani tengu xka 'buhu, xömhö hinxi hya'ahu ar ts'ohyate, ne nunar 'befi xta pehe da m'edi.

⁶Ha nú'mü mba penkp'u ar ku Timoteo, ba hönkagihe ar hoga mhö tengu ri jamfihu ne ri mhötehu. Bi xije xa gi bengagihe, ne gi ne gi hyandgagihe, nguje di nehe ga nu'ahe n'ehe.

⁷Jange tsi kuhu, nú'mü nda ohe nunar mhönu, xa da njohyahe, mödi ndi thohe nzeýe ya thogi ne ya nt'utsa, ngetho da pöhe mi tse ri jamfihu.

⁸Nu nda pöhe ngi umba ri muihu ngi teñhu ar tsi Hmu, da hñöhñöhe.

⁹Xi'mü, hanja hinga umfe njamödi Jö di beñ'ahe. Ngetho xa di pe'se n'ar döta johya hár nthandi ar tsi Dada.

¹⁰Parxui di afe Jö da 'raje ar seki ma ga k'ös'ahe ga fax'ahe da nxoge ri jamfihu habu 'bedi.

¹¹Jö ma Dadahu ne ma tsi Hmuhu Hesukristo da zixkagihe ma ga k'ös'ahe.

¹²Ma tsi Hmuhu da max'ahu da te ri mhötehu n'a ngu n'a, ne gi möhu gatho nu ma'ra ngu di mö'ahe n'ehe.

¹³Ne da max'ahu dar nzëdi ri muihu, ne gi hyehu gatho ya ts'oki. Gi 'buhu xint'axi hár nthandi Jö ma Dadahu, ne gi to'mhu xta penga ma tsi Hmuhu Hesukristo di ñ'owi gatho nu'u xi ñ'emui.

Nö'ö ar m'ui numañho Jö ga 'buhu

4 Nupya tsi kuhu, di a'ahe ar möte hár thuhu ar tsi Hmu Hesukristo, ne di xi'ahe xa gi umba ri muihu gi 'buhu xiñho, ngu da ut'ahe gi pefu Jö, ne hingi tsayahu gi 'yothu njap'u.

²Ngu xka pöhu, nunar tsi Hmu Hesukristo xi utkagihe nö'ö xta thok'ahe n'ehe.

³Ngetho nö'ö ne Jö, gi 'buhu xint'axi. Jange yo ma gi 'bengwihu ar 'behñö hingo ri nthötihi.

⁴Mahyoni n'a ngu n'a gi pöhu gi suhu ri 'behñöhu, gi 'buhu n'ar m'ui xint'axi ne xi nts'uni.

⁵Yo gi ñhehu da hya'ahu ar mfeni, ngu nu'u hingi pötwa ár 'ñu Jö.

⁶Hinto ma gi hyathu ri kuhu gi 'yothu nuya ts'okiyu, ngetho ngu xta xi'ahe ne xa xta thöthe, ar tsi Hmu ma da ko'spa ár ñöni.

⁷Ngetho Jö hinxi zokagihu ga othu ar ts'oki, xi zokagihu ga 'buhu n'ar m'ui xint'axi.

⁸Nö'ö to hingi ne da 'yoxa nö'ö di möñhe, hingi utsa ar ñ'oho, utsa Jö togo xi 'raju ár Hñö.

⁹Hinga mahyoni ga ot'ahu gi mö ri kuhu, ngetho gese Jö xi ut'ahu gi mhöhu n'a ngu n'a.

¹⁰Ne gi ñ'uhu njap'u hant'ahu gatho ya ku 'bu har hai Nmasedonia. Hönse di a'ahe, tsi kuhu, da hñuxa ri mhötehu.

¹¹Umba ri muihu gi 'buhu n'ar hogam'ui. Yo gi hesehu ri 'befihu, ne ja ri 'ye gi mpehu, ngu da xi'ahe gi 'yothu.

¹²Buhu xiñho, ne da ñomaño nu'u hinxi jamfi, ne hinte gi k'athu.

Nu xta penga ar tsi Hmu

¹³Di nehe da zo xiñho ri mfenihu tsi kuhu, tema da ja nu'u xi du, ne hinda du ri muihu, ngu nu ma'ra ya jö'i hinte ndo'mi.

¹⁴Ngetho nu'mu di ñ'emuihu ar tsi Hmu Hesu bi du ne bi mengi bi nte, di ñ'emuihu n'ehe, Jö ma da ko'spa ya te nu'u xi du mi jamfi ar tsi Hmu.

¹⁵Jange di ne ga xi'ahu ár mhö ar tsi Dada: Nuju gar 'buhuwa har hai nu xta penga ar tsi Hmu, hinga ma ga 'bet'ohu ga töhu nu'u xi du.

¹⁶Ngetho gese ar tsi Hmu ma da e mhets'i di ñö ngu ar ndö, ne ma da nt'o ár mhö n'ar ndö enxé, ne ma da nt'o ár ñheti ár k'axt'athuxi Jö. Ne nu'u xi du mi jamfi ar tsi Hmu Hesukristo ma da nank'u m'et'o.

¹⁷Nep'u nuju gar tethu nuya pa'u, dama da guxkagihu ha ya gui mahyegiwi nu'u xki du, ga nthehu ar tsi Hmu har ndöhi, ne njap'u ga 'buhwihu'ö gathu ya pa.

¹⁸Jange hñu'ma ri muihu n'a ngu n'a, möñhu nuya mhöyü.

5 Ma tsi kuhu, hinga mahyoni ga ot'ahu ar 'ñu ham'u da tho gathoyu.

²Ngetho gi pöhu xiñho, nú'mu xta ep'u ar tsi Hmu, ma da njangu n'ar bë tso 'bu nxui, hinto to'mi.

³Nu xta 'ñenga ya jö'i: Ra entho di 'buhu ne di pe'su n'ar hogam'ui, n'a nda dantho ma da 'ñepabi'u ar nhwati, jangu yá ugi di 'ñepabi n'ar

'behño ma da m'u ár bötsi, ne hinto ma da k'ont'i.

⁴Ha nu'ahu ma tsi kuhu, hingi 'buhu har 'bexui, jange nunar pa'ö hinda ma da zu'ahu ngu n'ar bë.

⁵Gatho'ihu yá bötsi'ihu ar hyats'i ne ar pa. Hingyá bötsi'ihu ar xui wa ar 'bexui.

⁶Jange hinga öhu ngu nu ma'ra. Ma ga ndö'mhu ne ga pöhu xiñho nö'ö di othu.

⁷Nu'u togo öhö, ö 'bu nxui, ha nu'u togo nti, 'bu nxui nti n'ehe.

⁸Hindi njahup'u, di 'buhu mpa, ne di pöhu nö'ö di pehu. Ga pe'su ar jamfri ne ar mhöte ngu ma hehu. Ne ga to'mhu ma mpohohu, gehnu di ko'ma ma ñöhu, ngu ár nt'oñö n'ar ndogu.

⁹Ngetho Jö hinxi zonkagihu da zuju ár kwe. Xi hwankagihu ga mpohu di ñ'emuihu ma tsi Hmuhu Hesukristo,

¹⁰gehnü bi 'yent'a ár te bi pokagihu. Jange ma ga 'buhwihu nu xta 'ñep'u, mödi ga tethu wa xta tuhu.

¹¹Jange hñu'ma ri muihu n'a ngu n'a, ne mfaxu da te ri jamfihu, ngu xka nzöihu gi othu.

Ar Pablo hu'mba yá mui ya gamfi

¹²Ma tsi kuhu, di a'ahu ar möte gi pe'sfu ar nsu nu'u mpep'u hár 'befi Jö, nu'u tsix'ahu ne zo'ahu.

¹³Möhu ne numañhohu, ngetho ot'u n'ar hoga 'befi pepa Jö. Ne 'buhu n'ar hogam'ui n'a ngu n'a.

¹⁴Di a'ahe n'ehe tsi kuhu, gi tsúhu nu'u ya döñhe, gi humfu yá mui nu'u hingi tse yá pa, faxu nu'u hingi tsedi, pe'spabihu ar ts'eti gathu.

¹⁵Hyanthü xiñho, yo ma gi ko'sthü ar ts'oki t'ot'ahü. Mahyoni gi pehü nö'ö xiñho n'a ngu n'a, ne gi japabihü njap'u gatho nu ma'ra.

¹⁶Xa gi johyahü hyax'mü.

¹⁷Yo gi tsayahü gi 'yafu Jö.

¹⁸Umfu njamödi Jö gatho nö'ö gi thohü, ngetho njap'u ne gi 'yothü gatho nu'u xka jamfihü ar tsi Hmu Hesukristo.

¹⁹Hyehü ár Hñö Jö da mpe ha ri muihü.

²⁰Yo gi utsahü nö'ö mönga yá m'ehni Jö.

²¹'Yoxu xiñho gatho, tsömhü nö'ö xiñho.

²²Hyehup'u gatho nö'ö hingi ho.

²³Ne gese Jö togo unga ar hogam'ui da t'axk'ahü xoge, ne

gatho ri mfenihü, ri hñöhü, ri pahü ne ri ndo'yohü di 'bu xiñho, ne hinte da k'as'ahü xta ep'u ma tsi Hmuhü Hesukristo.

²⁴Nö'ö togo xi zo'ahü hingi pata ár mfeni, jange nö'ö xi möñ'ö da 'yot'e.

**Ar Pablo har ngöts'i ñ'edi
ne apa Jö da max'u**

²⁵Ma tsi kuhü, 'yafu Jö da maxje.

²⁶Zengwagihep'u gatho ya ku, di pemfe n'ar ñhufi mhöte.

²⁷Di a'ahü hár thuhu ar tsi Hmu gi néhü mahyegiwi gatho nu ma'ra ya ku nunar he'minu.

²⁸Gi nthexkwihü ár nhwëki ar tsi Hmu Hesukristo. Dá njap'u.